

05 SEP 1998

Shahidan-Sokong

SHAHIDAN NYATAKAN SOKONGAN KEPADA MAHATHIR MENERUSI TELEGRAM

KANGAR, 5 Sept (Bernama) -- Menteri Besar Perlis Datuk Seri Shahidan Kassim yang mewakili badan perhubungan Umno negeri, para wakil rakyat dan semua peringkat kepimpinan Umno di negeri itu telah menghantar telegram untuk menyatakan sokongan padu mereka kepada Perdana Menteri, Datuk Seri Dr Mahathir Mohamad.

Mereka menyatakan merestui segala keputusan yang diambil Perdana Menteri mengenai kedudukan Datuk Seri Anwar Ibrahim dalam kerajaan dan parti bagi kepentingan masa depan parti dan negara.

Setiausaha Politik Menteri Besar, Baharudin Ahmad berkata, badan perhubungan negeri, kepimpinan peringkat cawangan, pergerakan pemuda dan wanita Umno di negeri itu sentiasa bersama Perdana Menteri dalam apa juga tindakannya yang difikirkan baik untuk masa depan semua.

Pergerakan Pemuda Barisan Nasional (BN) dan Pemuda Umno Perlis juga menyatakan sokongan penuh kepada tindakan Dr Mahathir melucutkan jawatan Anwar daripada kerajaan dan parti.

Ketua Pemuda BN dan UMNO negeri, Zahidi Zainul Abidin berkata, pergerakan itu berpendapat tindakan Perdana Menteri itu telah mengambil kira semua aspek dalam menangani isu ekonomi dan keselamatan negara.

"Saya berharap semua anggota pergerakan Pemuda BN, Pemuda UMNO dan para penyokong Anwar di negeri ini supaya memahami hasrat Perdana Menteri itu dan tidak melakukan sesuatu yang boleh mengeruhkan lagi keadaan," katanya pada persidangan media di sini hari ini.

Zahidi berkata Anwar wajar memohon maaf kepada Presiden parti dan anggota Umno supaya beliau dapat diterima kembali dalam UMNO suatu hari kelak.

"Tindakan itu lebih baik daripada melaksanakan hasrat beliau hendak mengadakan gerakan reformasi bersama parti pembangkang yang tidak membawa keuntungan kepada dirinya, parti dan rakyat," katanya.

-- BERNAMA

RIS KHY